

無量壽經優波提舍

婆藪槃豆菩薩造 元魏天竺三藏法師菩提流支譯



南無本師釋迦牟尼佛

說 明

本繁體校正版《無量壽經優波提舍》電子書，根據《乾隆大藏經》，第 87 冊，第 1197 部，大乘論部，婆藪槃豆菩薩造、元魏天竺三藏法師菩提流支譯《無量壽經優波提舍》影印本校正製作，特此說明。

仁慧草堂

二〇一七年十一月

無量壽經優波提舍

婆藪槃豆菩薩造

元魏天竺三藏法師菩提流支譯

無量壽經優波提舍願生偈

世尊我一心， 歸命盡十方，
無礙光如來， 願生安樂國。
我依修多羅， 真實功德相，
說願偈總持， 與佛教相應。
觀彼世界相， 勝過三界道。
究竟如虛空， 廣大無邊際。
正道大慈悲， 出世善根生。
淨光明滿足， 如鏡日月輪。
備諸珍寶性， 具足妙莊嚴。
無垢光炎熾， 明淨曜世間。
寶性功德草， 柔輓左右旋；
觸者生勝樂， 過迦旃隣陀。
寶華千萬種， 彌覆池流泉；
微風動華葉， 交錯光亂轉。
宮殿諸樓閣， 觀十方無礙；
雜樹異光色， 寶欄遍圍遶。

無量寶交絡，羅網遍虛空；
種種鈴發響，宣吐妙法音。
雨華衣莊嚴，無量香普熏。
佛慧明淨日，除世癡闇冥。
梵聲悟深遠，微妙聞十方。
正覺阿彌陀，法王善住持。
如來淨華眾，正覺華化生。
愛樂佛法味，禪三昧為食。
永離身心惱，受樂常無間。
大乘善根界，等無譏嫌名；
女人及根缺，二乘種不生。
眾生所願樂，一切能滿足。
故我願往生，阿彌陀佛國！
無量大寶王，微妙淨華臺。
相好光一尋，色像超羣生。
如來微妙聲，梵響聞十方。
同地水火風，虛空無分別。
天人不動眾，清淨智海生。
如須彌山王，勝妙無過者。
天人丈夫眾，恭敬遶瞻仰。
觀佛本願力，遇無空過者，
能令速滿足，功德大寶海。

安樂國清淨， 常轉無垢輪；
化佛菩薩日， 如須彌住持。
無垢莊嚴光， 一念及一時，
普照諸佛會， 利益諸羣生。
雨天樂華衣， 妙香等供養，
讚佛諸功德， 無有分別心。
何等世界無， 佛法功德寶，
我願皆往生， 示佛法如佛。
我作論說偈， 願見彌陀佛，
普共諸眾生， 往生安樂國。

無量壽修多羅章句，我以偈總說竟。

論曰：此願偈明何義？觀安樂世界，見阿彌陀佛，願生彼國土故。云何觀？云何生信心？若善男子、善女人修五念門成就者，畢竟得生安樂國土，見彼阿彌陀佛。何等五念門？一者，禮拜；二者，讚歎；三者，作願；四者，觀察；五者，回向。

云何禮拜？身業禮拜阿彌陀佛、如來、應、正遍知，為生彼國意故。

云何讚歎？口業讚歎，稱彼如來名，如彼如來光明智相，如彼名義，欲如實修行相應故。

云何作願？心常作願，一心專念，畢竟往生

安樂國土，欲如實修行奢摩他故。

云何觀察？智慧觀察，正念觀彼，欲如實修行毗婆舍那故。彼觀察有三種。何等三種？一者，觀察彼佛國土功德莊嚴；二者，觀察阿彌陀佛功德莊嚴；三者，觀察彼諸菩薩功德莊嚴。

云何回向？于彼觀察一切世間苦惱眾生，同願生彼安樂國土。願心所有功德善根以巧方便作願回向，攝取眾生，不舍一切世間故。

云何觀察彼佛國土功德莊嚴？彼佛國土功德莊嚴者，不可思議力故。如彼摩尼如意寶性，相似相對法故。

觀察彼佛國土功德莊嚴者，有十七種事。應知！何者十七？一者，清淨功德成就；二者，無量功德成就；三者，性功德成就；四者，形相功德成就；五者，種種事功德成就；六者，妙色功德成就；七者，觸功德成就；八者，莊嚴功德成就；九者，雨功德成就；十者，光明功德成就；十一者，聲功德成就；十二者，主功德成就；十三者，眷屬功德成就；十四者，受用功德成就；十五者，無諸難功德成就；十六者，大義門功德成就；十七者，一切所求功德成就。

清淨功德成就者，偈言：“觀彼世界相，勝

過三界道”故。

無量功德成就者，偈言：“究竟如虛空，廣大無邊際”故。

性功德成就者，偈言：“正道大慈悲，出世善根生”故。

形相功德成就者，偈言：“淨光明滿足，如鏡日月輪”故。

種種事功德成就者，偈言：“備諸珍寶性，具足妙莊嚴”故。

妙色功德成就者，偈言：“無垢光炎熾，明淨曜世間”故。

觸功德成就者，偈言：“寶性功德草，柔輭左右旋；觸者生勝樂，過迦旃隣陀”故。

莊嚴功德成就者，有三種。應知！何等三？一者，水；二者，地；三者，虛空。莊嚴水者，偈言：“寶華千萬種，彌覆池流泉；微風動華葉，交錯光亂轉”故。莊嚴地者，偈言：“宮殿諸樓閣，觀十方無礙，雜樹異光色，寶欄遍圍遶”故。莊嚴虛空者，偈言：“無量寶交絡，羅網遍虛空；種種鈴發響，宣吐妙法音”故。

雨功德成就者，偈言：“雨華衣莊嚴，無量香普熏”故。

光明功德成就者，偈言：“佛慧明淨日，除世癡闇冥”故。

妙聲功德成就者，偈言：“梵聲悟深遠，微妙聞十方”故。

主功德成就者，偈言：“正覺阿彌陀，法王善住持”故。

眷屬功德成就者，偈言：“如來淨華眾，正覺華化生”故。

受用功德成就者，偈言：“愛樂佛法味，禪三昧為食”故。

無諸難功德成就者，偈言：“永離身心惱，受樂常無間”故。

大義門功德成就者，偈言：“大乘善根界，等無譏嫌名；女人及根缺，二乘種不生”故。淨土果報，離二種譏嫌過，應知：一者，體；二者，名。體有三種：一者，二乘人；二者，女人；三者，諸根不具人。無此三過故，名離體譏嫌。名亦有三種：非但無三體，乃至不聞二乘、女人、諸根不具三種名故，名離名譏嫌等者，平等一相故。

一切所求功德滿足成就者，偈言：“眾生所願樂，一切能滿足”故。

略說彼阿彌陀佛國土莊嚴十七種功德，示現如來自身利益大功德力成就，利益他功德成就故。彼無量壽佛土莊嚴，第一義諦妙境界相，十六句及一句，次第說。應知！

云何觀佛功德莊嚴成就？觀佛功德莊嚴成就者，有八種。應知！何等八種？一者，坐莊嚴；二者，身莊嚴；三者，口莊嚴；四者，心莊嚴；五者，眾莊嚴；六者，上首莊嚴；七者，主莊嚴；八者，不虛作住持莊嚴。

何者坐莊嚴？偈言：“無量大寶王，微妙淨華臺”故。

何者身莊嚴？偈言：“相好光一尋，色像超羣生”故。

何者口莊嚴？偈言：“如來微妙聲，梵響聞十方”故。

何者心莊嚴？偈言：“同地水火風，虛空無分別”故。無分別者，無分別心故。

何者眾莊嚴？偈言：“天人不動眾，清淨智海生”故。

何者上首莊嚴？偈言：“如須彌山王，勝妙無過者”故。

何者主莊嚴？偈言：“天人丈夫眾，恭敬遶

瞻仰”故。

何者不虛作住持莊嚴？偈言：“觀佛本願力，遇無空過者，能令速滿足，功德大寶海”故。

即見彼佛未證淨心菩薩，畢竟得平等法身，與淨心菩薩無異。淨心菩薩與上地諸菩薩，畢竟同得寂滅平等故。略說八句，示現如來自利利他，功德莊嚴，次第成就。應知！

云何觀菩薩功德莊嚴成就？觀菩薩功德莊嚴成就者，觀彼菩薩有四種正修行功德成就。應知！何等為四？一者，於一佛土身不動搖，而遍十方種種應化。如實修行，常作佛事。偈言：“安樂國清淨，常轉無垢輪；化佛菩薩日，如須彌住持”故，開諸眾生淤泥華故。二者，彼應化身，一切時不前不後，一心一念，放大光明，悉能遍至十方世界，教化眾生，種種方便，修行所作，滅除一切眾生苦故。偈言：“無垢莊嚴光，一念及一時，普照諸佛會，利益諸羣生”故。三者，彼於一切世界無餘，照諸佛會大眾無餘。廣大無量、供養恭敬、讚歎諸佛如來。偈言：“雨天樂華衣，妙香等供養，讚佛諸功德，無有分別心”故。四者，彼於十方一切世界無三寶處，住持莊嚴佛法僧寶，功德大海遍示令解，如實修行。偈

言：“何等世界無，佛法功德寶，我願皆往生，示佛法如佛”故。

又向說“佛國土功德莊嚴成就，佛功德莊嚴成就，菩薩功德成就。此三種成就願心莊嚴，略說入一法句故。一法句者，謂“清淨句”；清淨句者，謂“真實智慧，無為法身”故。此清淨有二種。應知！何等二？一者，器世間清淨；二者，眾生世間清淨。器世間清淨者，向說“十七種佛國土功德莊嚴成就”，是名器世間清淨。眾生世間清淨者，如向說“八種佛功德莊嚴成就、四種菩薩功德莊嚴成就”，是名眾生世間清淨。如是一法句，攝二種清淨。應知！

如是菩薩，奢摩他、毗婆舍那，廣略修行，成就柔輭心。如實知廣略諸法，如是成就巧方便回向。何者菩薩巧方便回向？菩薩巧方便回向者，謂說“禮拜等五種修行，所集一切功德善根，不求自身住持之樂，欲拔一切眾生苦”故，作願攝取一切眾生，共同生彼安樂佛國，是名菩薩巧方便回向成就。菩薩如是善知回向成就，遠離三種菩提門相違法。何等三種？一者，依智慧門，不求自樂，遠離我心貪著自身故；二者，依慈悲門，拔一切眾生苦，遠離無安眾生心故；三者，依方

便門，憐愍一切眾生心，遠離供養恭敬自身心故。是名遠離三種菩提門相違法故。

菩薩遠離如是三種菩提門相違法，得三種隨順菩提門法滿足故。何等三種？一者，無染清淨心，以不為自身求諸樂故；二者，安清淨心，以拔一切眾生苦故；三者，樂清淨心，以令一切眾生得大菩提故，以攝取眾生生彼國土故。是名三種隨順菩提門法滿足。應知！

向說“智慧、慈悲、方便三種門攝取般若，般若攝取方便”。應知！

向說“遠離我心不貪著自身，遠離無安眾生心，遠離供養恭敬自身心。此三種法，遠離障菩提心”。應知！

向說“無染清淨心，安清淨心，樂清淨心。此三種心略一處，成就妙樂勝真心”。應知！

如是菩薩智慧心、方便心、無障心、勝真心，能生清淨佛國土。應知！

是名菩薩摩訶薩隨順五種法門，所作隨意，自在成就。如向所說“身業、口業、意業、智業、方便智業，隨順法門”故。

復有五種門，漸次成就五種功德。應知！何者五門？一者，近門；二者，大會眾門；三者，

宅門；四者，屋門；五者，園林遊戲地門。此五種門，初四種門，成就入功德；第五門，成就出功德。

入第一門者，以禮拜阿彌陀佛為生彼國故，得生安樂世界。是名入第一門。

入第二門者，以讚歎阿彌陀佛，隨順名義，稱如來名，依如來光明知相修行故，得入大會眾數。是名入第二門。

入第三門者，以一心專念，作願生彼，修奢摩他、寂靜三昧行故，得入蓮華藏世界。是名入第三門。

入第四門者，以專念觀察彼妙莊嚴，修毗婆舍那故，得到彼處，受用種種法味樂。是名入第四門。

出第五門者，以大慈悲觀察一切苦惱眾生，示應化身，回入生死園煩惱林中，遊戲神通，至教化地，以本願力回向故。是名出第五門。

菩薩入四種門，自利行成就。應知！菩薩出第五門，利益他，回向行成就。應知！

菩薩如是修五門行，自利利他，速得成就阿耨多羅三藐三菩提故。

迴向偈

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國